

vnd verordnet sein / Esa. 91. Seindt nicht Christi Füß der Es. 11.
 Glaubigen / die Armen vnd Elenden / welche im Staube li-
 gen / vnd so kümmerlich Leben? Diese Füß seind für Gott
 dem Allerhöchsten / vnd für allen H. Engel weit höher geach-
 tet vnd angesehen / als alle gottlose Königreich vnd Keyser-
 thumb? Daran gedencket ihr geringen vnd verachter / so offte
 ihr ewr Schuh anziehet / traget vnd betrübet euch nicht vber
 ewer Verachtung. Es heist: vor der Welt veracht / vor Gott
 groß geacht.

Zum vierdten gereicht es dem löblichen Schumacher
 Handwerk zu einem sonderbaren Lob vnd Ruhm / das von
 ihnen vnd aus ihrer Werkstatt viel fürneme vnd sehr herrli-
 che Leut geboren vnd herkommen seind. Ist nicht Iphicra-
 tes, welcher ein fürtrefflicher Redner vnd ein sehr berühmter
 Kriegsoberster gewesen ist / von einem Schumacher zu Athen
 geboren worden? Wer ist P. Alphenus Varus gewesen? Die-
 ser ist nicht allein eins Schumachers Sohn gewesen / sondern
 hat das Schumacher Handwerk von seinem Vater gelernet /
 vnd ein Zeitlang getrieben / aber endlich hat er desselbige ver-
 lassen vnd auffgegeben vnd ist nach Rom gezogen / vnd hat all-
 da Servium Sulpitium im Rechten gehöret vnd so viel erkant-
 nuß bekommen / daß er von rechten Büchern geschrieben vnd in
 sonderheit libros digestorum & Coliectaneorum hinder-
 sich verlassen / vnd hat noch darvber neben P. Vinitio, das
 Bürgemeister Ampt zu Rom bekommen. Dessn gedencket
 er Pöet Horatius lib. 1. sermonum

————— ut Alphenus vafer, omni

Abiecto instrumento artis, clausaq; taberna

Sutor erat sapiens operis. —————

Wer war Dionysius Mitylenæus der Pöet, welcher
 nicht allein Palladis vnd Bacchi exercitum, sondern auch die
 Argonautica geschrieben hat? Ist er nicht auch ein Schu-
 macher gewesen? B iij Wer!